



Kiek ins nao bove

Jef Bartellet, VMG

Gemeintelogo oontmaskerd

De jonges vaan de gemeente wèlle ouch wel ins get aanders. Daorum is Mestreech allewijl e nuij beeldmerk riek. Mierdere oetveuringe zelves. Ierlek is ierlek; chapeau veur de fotoserie boe 'gewoene' Mestreechtenere es sjèldhawwers op fungere. Daomèt is 't volk vaan Mestreech hiel content, meh euver deen ingel op 't logo is de hèl losgebarste.

Wat wèl noe 't geval? Geluif 't of neet, meh op 't ierste oontwerp (opgedoke door e leek örgens) stoont gaaroet neet 'nne ingel meh 'nne sprinkhaon. Dat bies, zelfbewös, doordrondje vaan eige geliek, ambitieus, wars van gedoge, en bekind vraatzuchtig nao z'n umgeving touw mèt e stèl stevige puu um eeder vörm vaan verzèt de löss in te stampé.

En dat is noe percijs wat 't oontwerp-buro vaan dao bove (boe 't graas ummertouw greuner is) veur ouge stoont um oetdrökkung te geve aan de ambities vaan de stad (zoe get sjint modern te zien). Noe is doen ein dink, meh eus naobers al bij veurbaat op de kas jaoge, dat waor zelfs 'die vaan us' toch 'nne stap te wied. Ze koume 'r nog vreug genög achter boe groete broor Mestreech op oet is. En zoe woort meh weer d'n ingel vaan stal gehaold. Ocherm, flink opgepimp in mäötsje anorexia en met lètterlek 'nne lege kop, zoe weggeplök oet 'America's next top model'.

Boebij d'n oontwerper, gesjaggeneerd door de aofwijzing vaan zien ierste oontwerp, 't verdomd heet die móntsterpuu weg te gumme. Dat bespaorde tenslotte weer op de oontwerpkooste vaan de letter M. Tot ze dao oeteindelek ingetrap zien mèt zoe'n gedeformeerde hittepetit, is 'n blamaasj vaan de ierste orde.

"Die vaan us' hadde ziech väöl chagrijn en meujté (én e bedraag vaan bekans zes ciefers) kinne bespaore door ins te sjoppe bij al die ingele die veer al riek zien. Wat dach geer vaant' ierste gemeintewaope oet 1819 of de prònte wateringel vaan de Oeverwal (dee noe in 't logo vaan de VMG steit). Meh eus veurkeur geit toch oet nao d'n ingel vaan 't stadhoes. Mesjiens hadde de hiere bestuurdere bij hön werk ins beter nao bove mote loere. Hadde ze 'm toch miech dunk oets ins mote zien. Is dat geine sjieke!

Te awwerwets? Nein hiere, dat neump me histories besef, bij uuch in dit geval sjijns oet 't oug verlore. Al 350 jaor loert heer (of zie) neer op wat Mestreech in dee lange tied heet bewoge en mètgemaak, jao, same mèt häör heet gelache en gejenk. Kiek, dat is 'nne ingel met inhaajt, ech eine vaan us, dee mèt rech eus stad zouw mage prizzentere. E tiedloos symbool met ieuwigheidsweerde; in 't verleie, noe en in de touwkoms!

Euze echte ingel moet tröök. Alaaf !

